

Epetoidi inänite **Pabodo nänö cadota ante yewæmongainta**

Waa quëwencæminimpa, ante

¹ Wængonguï angä ëñëninque Itota Codito botö imote da godongä gogaïmo inte botö Pabodobo inömö inte yewæmömopa. Epeto inömö quëwëmini incæ minitö Wængonguï quimini inte Itota Codito nempo quëwëninque në ædæmö cæte pönëmini inöminite botö, Minitö acæminimpa, ante yewæmömopa. ² Mönö Mæmpo Wængonguï tönö mönö Awënë Itota Codito piyænë cæte waadete pönö cæda ate minitö gänë pönëninque waa quëwencæminimpa, ante yewæmömopa.

*Codito nempo quëwëninque mönö eyepæ
ëwocamompa*

³ Mönö Awënë Itota Codito Wæmpocä inongante Itota inömö adocä ingantedö ante, Botö Wængonguï inongä ingampa, ante apænegacäimpa. Inique mönö inömö Codito tönö do öönæde æite bai tömengä nempo quëwëñömonte adocä Itota Wængonguï incæ tæiyæ waëmoncoo në ëwocagaingä inte pönö cæcä æninque mönö tömengä nänö ëwocadoncoo tömancoo bai adobai eyepæ pöni ænte ëwocamompa. Mänömai cæcä adinque mönö tömengä ingante apænedinque, Bitö waa pöni cæbi æmönipa, ante watapæ apænecäimpa. ⁴ Tömengä inömö edæ, Codito nempo quëwëninque

mīnitō botō ayōmo edæ tæiyæ waēmō ēwocamīni
 inte edæ wentamō mongænāmaī incæmīnīmpa,
 ante tōmengā inguipoga nānō badōnāmaī iñedē
 incæ mōnō īmonte pōnō apænte ængacāīmpa.
 Ayæ mōnō īmonte waadete pōnēnīnque tōmengā,
⁵ Botō pæpogate baī æmo beyænque mīnitō
 iñōmō Itota Codito nempo quēwēnīnque botō
 wēmīni baquīmīni incæmīnīmpa, ante cædinque
 tocæboīmpa, angacāīmpa. Īnīnque tōmengā doyedē
 nānō angaiñō baī cædinque pōnō angā ate mōnō
 Wængonguī wēmō cōwē baquēnēmō ingamōīmpa.

⁶ Edæ nanguī waadete pōnō cædinque tōmengā
 nānō nē Waadecā ingante da pōnongā æmōmpa.
 Mānōmaī beyæ mōnō iñōmō tōmengā ingante, Bitō
 ñāō apāite baī ēmōnōmi inte mānōmaī waadete
 pōnō cæbi æmōnīpa, ante watapæ apænecāīmpa.
⁷ Edæ tōmengā nānō nē Waadecā iñōmō mōnō
 īmonte æncæte ante nāmā wepæ godonte ængā
 beyænque mōnō abæ tawænte quēwēmōmpa.
 Ayæ adobaī tōmengā wepæ inte ñā mēnongacā
 beyænque ēñēnāmaī mōnō cædō ante Wængonguī
 nanguī waadete pōnō cædinque ñīmpo cæcā
 quēwēmōīmpa. ⁸ Tōmengā iñōmō edæ, Æbānō ī,
 ante tōmānō ante nē ēñēnongā inte, Æbānō cæquīī,
 ante edæ nōingā ēñēnīnque mōnō beyæ ante
 godōmenque nanguī pōnō cæcā æmōīmpa. ⁹ Ayæ
 edæ, Codito tōnō guēa cædinque nāmā botō ānō baī
 cæte tocæboīmpa, ante Wængonguī angacāīmpa.
 Tōmengā mānōmainō ante nānō wēmō iñōmō
 angaiñō ante mōnitō īmōnite ñōwo edonque pōnī
 odōmonte apænecā ēñēmōnīpa. ¹⁰ Tōmengā, Īñedē
 cæcæboīmpa, ānīnque tōmengā nānō angaiñedē

īinque ba ate tōmengä nänö angainö bai edæ īinque cæcæcäimpa. Edæ öönæde ongoncoo tönö ingui-poga ongoncoo tōmancoo tē gæte māmō adocanque nempo Codito Awënē nempo godōmo æncæcäimpa, ante cæcampa.

¹¹ Nämä pönente nänö angainö bai tōmänö ante adobai pōni nē cædongä inte Wængongui, Īimāi cæcæboimpa, ante pönente ate cōwē cæcampa. Īinque tōmengä, Codito nempo quēwēnāni īnānite æncæboimpa, ante nänö pönente angainö bai cædinque, Mīnitō Codito nempo quēwenguīmīni incæmīnimpa, ante pönēninque mōnitō īmōnite apænte ængacäimpa. ¹² Mōnitō, Codito beyæ watapæ bacæimpa, ante tāno pönēmōni īñmōnite tōmengä, Botō ñāō ēmōnō ante watapæ apænemīni bacæmīnimpa, ante mōnitō īmōnite pōnō apænte ængacäimpa.

¹³ Ayæ, Codito pōnō ængä beyænque mīnitō quēwencæmīnimpa, ante Wængongui watapæ nänö apænegainö ante ēñente pönēninque mīnitō epe-teomīni adobai Codito nempo quēwēmīni īmīnipa. Wede pönēmīni adinque Wængongui, Botō wēmīni īmīnipa, ante edonque acæimpa, ante odōmoncæte ante tōmengä ēmōwo ante mīnitonga yewæmonte bai cædinque tōmengä Tæiyæ Waēmō Önōwoca ingante da pōnongä ænte ēwocamīnipa. ¹⁴ Edæ Wængongui, Botō quimīni īnōmīni inte mīnitō abæ tawænte mīni goyedē mīnitō ænguincoo māñīñedē ate eyepæ pōni æncæmīnimpa, angampa. Äninque tōmengä, Nō pōni impa, ante ēñencæmīnimpa, ante cædinque tōmengä Önōwoca ingante ñōwo da pōnongä ænte ēwocamompa. Īinque panca-

cooga do ænte bai ewocamö inte mönö, Ìincayæ ate mönö tömancoo ænguinque impa, ante edonque eñengæimpa. Tömengä mänömaï cæcä adinque mönö, Wængongui bitö godömenque ñäö apäite bai bitö emonguinque mänömaï cæbipa, ante watapæ apænecæimpa.

Nö eñenäni bacæðänimpa, ante Pabodo apænecampa

¹⁵ Botö iñömö, Epeteoidi mönö Awënë Itota ingante wede pönänäni inänipa, ante tededäni eñentabopa. Ayæ adobai, Wængongui quinäni tömänäni inänite epeteoidi iñömö waadete pönänäni inänipa, ante eñenimo inte, ¹⁶ botö ñimpo cæðämaï inte Wængongui ingante cöwë waa ate pönëninque apænebopa. Ayæ minitö beyæ ante cöwë apænebopa. ¹⁷ Itota Codito mönö Awënë iñongante Wængongui iñömö adocä Codito Wængongui inongä ingampa. Ayæ në Mæmpocä inongä inte tömengä ñäö emönongä ingampa. Tömengä ingante apænedinque botö, Bitö Önöwoca ingante da pönömi æninque epeteoidi iñömö në eñenäni bacæðänimpa, ante apænebopa. Ayæ, Bitö Önöwoca pönö odömongä adinque epeteoidi wæætë Itota Codito ingante do ate bai ædæmö pönencæðänimpa, ante botö minitö beyæ ante Wængongui ingante cöwë apænebopa.

¹⁸ Wængongui pönö cæcä beyænque watapæ bacæimpa, ante minitö pönente tocæminimpa, ante cædinque Wængongui minitö iminite aa pegacäimpa. Ayæ adobai, Mönö tömengä quimö inte tæiyæ waëmö bayömonte tömengä nänö godömenque ñäö emonguinque mönö imonte

ængacäimpa. Mänine mënea edæ näwangä ñepa, ante minitö eñencæminimpa, ante botö, Wængongui bitö tömënäni mïmönë tica ënente bai odömonte apænebi ate do eñencädänimpa, ante Wængongui ingante apænebopa. ¹⁹ Mönö në pönëmö ññömonte Wængongui nänö pönö cæquinö ante tömengä nänö tæi piñæmämö æpodö i, ante mönö ædö cæte tee mante aqui. Incæte minitö, Mänimämö ante æpodö i, ante epeteoidi eñencädänimpa, ante botö Wængongui ingante apænebopa. Edæ, Tömengä nänö tæi piñæmämö ññömö æbänö i, ante eñencæte ante mönö, Tömengä gomonga tæi piñænongä inte iima cægacäimpa, ante eñengæimpa.

²⁰ Në tæi piñænongä inte Wængongui angä ate mönö Codito ññömö do wæningä inte edæ do ñäni ömæmongacäimpa. Ayæ godömenque tæi piñæninque Codito ingante öönæde ænte mæidinque Wængongui tömëmæ ñnö angä Codito tæ contagacäimpa. ²¹ Edæ æcämenque pedænguipoga ññonte müinguipoga ññonte ñænængä inte në angä ñnaa, æcämenque në awënë ñnaa, æcämenque tæi piñænte ongongä ñnaa, æcämenque ingante, Awënë ingampa, ante godö pemönänii mäninäni tömänäni öñönänique incädänimpa. Mönö Codito adocanque ingante ogæ æænonte bai cædinque Wængongui angä ate tömengä wæætë Tæiyæ Awënë bacä acæimpa. ²² Ayæ Wængongui tömäo ññömö ongoncoo Codito öñöwaca ñnö pönö wææntodöninque edæ, Bitö edæ Tæiyæ Awënë ñnömi inte edæ æmonga pönö ongoncæbiimpa, angacäimpa. Ayæ, Bitö imite godongämæ në pönënäni tömënäni Ocamö bai ññömite, ²³ tömënäni wæætë bitö baö bai adoyonque bai incädänimpa.

Codito ingante mänömaïnö ante apænedinque Wængongui, Bitö nê Awënë inömi inte tömäo iñömö ongoncoo tömancoo bitö nempo ongoncooque bacæimpa. Ayæ bitö imite nê pönênäni iñömö bacoo inäni yebænäni ininque bitö enempodö eyede pöni bacæimpa, ante Wængongui Codito ingante pönö cægacäimpa.

2

Wængongui nänö waadete pönönö beyænque quëwëmö

¹ Minitö guiquënë wëenëñedë ëñênämaï cæte quëwëmini inte wënæ wënæ mini cädö beyæ dobæ edæ wæwocaimini ingaminimpa. ² Nê inguipogaque ante pönênäni taadö adodö cægonte bai minitö mäniñedë edæ wënæ wënæ cæte quëwengaminimpa. Ayæ wënæidi tæi piñænte nani owocabo awëmö iñömö nani cægönö adodö gote bai minitö tömênäni awënë miñæ tee empote godinque wënæ wënæ cægaminimpa. Ñöwo incæ Wængongui nänö änö ante nê ëñênämaï cæte quëwënäni guiquënë adocä wënæ awënë nänö pönëwënö ante ëñente ëwocadinque cädänipa. ³ Wëenëñedë tömênäni tönö godongämæ quëwëninque mönö tömämö adobai imæcaque ante pönëninque mönö towëmämoque ante quëwengamöimpa. Quiëmenque ante towencæte ante mönö cæinëwënö ante cædinque mönö ocaidë ædëmenque pönëninque mönö cæinëwënonque cæte quëwengamöimpa. Ininque wadäni nani tente wæquënëñö bai mönö adobai imæcaque ante pönente nê cæmö inömö inte edæ Wængongui

nänö piinte panguenämämo ante edæ do tente wæquenämö ingamöimpa.

⁴ Mänömaï ingaimö iñömonte Wængongui mönö imonte nanguï waadete pönëninque iïmaï nanguï waadedongä inte pönö waa cægacäimpa. ⁵ Mönö eñenämaï cægainö beyæ ante wæwocate wæyömonte tömengä pönö cæcä beyænque mönö Codito tönö godongämæ quëwëmompä. Minitö edæ Wængongui nänö waadete pönö cægainö beyænque quëwëmini iminipa. ⁶ Wængongui angä Codito ñäni ömæmöñongä mönö tömengä tönö godongämæ ñäni ömæmonte bai müimö badinque quëwengamöimpa. Ayæ mönö tömengä nempo quëwëmö iñömonte Wængongui iñömö Itota Codito ingante ææntodöninque mönö imonte öönädë ææntodonte Itota tönö pönö gönongä tæ contate bai ongömompä. ⁷ Mänömaï Itota Codito nempo quëwëñömonte Wængongui iñömö, Botö pönö waadete cædinque godömenque gomonga cæbo acædänimpa, ante cægacäimpa. Ayæ, Miinguiipo badömo ate botö mäniñedë ate odömömo adinque tömänäni, Wængongui nänö waadete pönö cæganca wadäni dicæ adoganca cædäniyaa, ante wæcædänimpa, ante cæcæte ante mänömaï cægacäimpa.

⁸ Edæ Wængongui nänö waadete pönö cægainö beyænque minitö mini quëwënguinque wede pönëmini baminitapa. Incæte minitö dicæ nämä mini cæinö beyænque në wede pönëmini baminitawogaa. Wæætë edæ Wængongui pönongä æninque minitö në wede pönëmini baminitapa.

⁹ İninque, Nämanque cæte quëwëmo aedäni, ante

mönö edæ änāmaī ingæimpa. Īñæmpa wīī mönö cædō beyæ quëwëmompā. ¹⁰ Edæ Wængonguī nānō nē badongaimō inōmō imompā. Ayæ, Codito nempo nē quëwënāni ĩmaī cædinque waa cæcædānimpā, ante tōmengā wëenëñedē mönö cæquënënō ante eyepæ badongacāimpā. Īninqe mönö imonte badōninqe tōmengā, Codito Itota nempo quëwëninqe mīnitō mīni waa cæquënënō ante edæ cæte quëwencæmīnimpā, ante pōnō badongā bagamōimpā.

Codito beyænque gancæ pōnëmompā, ante

¹¹ Mānōmaī beyæ mīnitō, Doyedē ĩmaī ingatimpā, ante pōnëedāni. Oodeoidi ĩñōmō ōnompoca æmontaique eō togæināni inte nāmanque ante edæ, “Nē eō togæimōni ĩmōnīpā,” ante pemonte baī apænedānīpā. Wæætē mīnitō oodeomīni ināmaī nē ëñagaimīni ĩñōmīnite, “Bagāamīni ĩmīnipææ,” ante mānīnāni pīwënāni wægāmīnimpā. Īninqe mīnitō māniñedē æbānō ingaimīni inōmīni, ante yewæmōmo ate pōnëedāni. ¹² Māniñedē edæ mönö Codito nempo quëwënāmaī ingaimīni inte mīnitō mōni idægocabo nempo adobai edæ quëwënāmaī inte nānënē quëwengāmīnimpā. Īninqe Wængonguī, ĩmaī cōwē pōnō cæcæboimpā, ante nānō angainō ante mōnitō godongāmæ Ao ante ëñente quëwëñōmōnite mīnitō wæætē gobæ nānënē quëwëninqe Wængonguī nānō angainō ante edæ ænāmaī ingāmīnimpā. Watapæ bacæimpā, ante mōnitō pōnënō ante mīnitō ĩñōmō nānënē quëwente ædō cæte watapæ pōnente toquīmīni. Gobæ quëwëninqe mīnitō Wængonguī nempo edæ quëwënāmaī ingāmīnimpā.

13 Incæte mīnitō gobæ nē quēwēnōmīni iñōmīnite Itota Codito nāmā wepæ godonte ænīnque mīnitō imīnite ænte māmōngā eyequei pōni pōnīnque mīnitō ñōwo tōmengā nempo quēwēmīnīpa.

14 Wēēnēñedē mōnitō tōnō mīnitō guēadō guēa cædōmō ingaimō inte mōnō, Nānēnē incēmīnīmpa, ante wææ cæ impa tæcæguedē wææ gōnonte bai cægāmōimpā. Codito iñōmō nē piyænē cædongā inte, Wææ cæ impa, mōnō ānōmpa bæ tate wido cæte bai cædinque mōnō imonte āññōmonque badōngā bamōimpā. Īnīnque tōmengā mīmōnē nē piyænē cæte entawēnōngā ingā beyænque mōnō adobai gānē pōnēmōmpa. 15 Edæ Wængōnguī, Īīmaī cædāni, ante wade wade ante nānō wææ angainō ante ēñēnīnque dodāni godōmenque wææ angadānīmpa. Mōnō Codito iñōmō inguipoga pōnīnque mānīne ante tōmānō ante ēñēnte cæte quēwēngacāimpā. Ayæ, Idæwaa wææ ante impa, ante bai cædinque tōmengā mānīne ante nāmā baōngā mōngænte wænīnque tee moncate bai cægacāimpā.

Mānōmaī cædinque tōmengā, Mīnitō mencaboga inte nānēnē quēwēmīni incæte ñōwo piyænē cæte botō nempo godōngāmæ quēwēncēmīnīmpa, ante cædinque mōnō imonte ænte wempo cægacāimpā. Īnīnque mōnō edæ piyænē cæte quēwēngūnque edæ āññōmonque bagāmōimpā. 16 Itota Codito ingante awāa timpodāni wængā Īnīnque tōmengā mōnō guēadō guēa piīnte cægālmāmo ante ænte mōngænte wido cæte bai wængā beyænque mōnō piyænē cæmō bagāmōimpā. Ayæ ado tōmengā awāa nānō wængainō beyænque mōnō

tömämö adocabomö bamö adinque Wængongui wæætē piyænē cædinque mönö imonte Ao äninque ængacäimpa. ¹⁷ Minitö guiquenē gobæ nänenē quēwēñömönite mönitö guiquenē Wængongui weca eyequei quēwēñömönite Codito iñömö inguipoga pöninque mönö tömämö imonte apænedinque, Piyænē cæte gänē pönente quēwēedäni, ante pönö apænecä eñentamompa. ¹⁸ Tömengä nänö pönö cægainö beyænque möni oodeocabo adobaï minitö wamini adobaï mönö tömämö Wængongui Önöwoca adowocaque ingante ewocamö inte mönö Wæmpocä weca tömämö do pömompa.

¹⁹ İninque mönitö Wængongui quimöni do bagaimöni inte Wængongui nempo quēwēmöni ingaimöni baï Codito nänö pönö cægainö beyænque minitö adobaï mönitö tönö adocabomini do badinque edæ Wængongui nempo quēwēmini iminipa. İninque minitö ñöwo idæwaa wamini ingaminimpa. Wii wabæca quēwente baï edæ tömēmīni oncönē ponte owote baï minitö ñöwo Wængongui nempo quēwēmīnīpa. ²⁰ Waodäni dica tano gönöninque tänocaa wænömēnæca mænönäni baï Wængongui adobaï cædinque Itota Codito ingante tano gönongä ongöñongante tömengäa godö mænonte baï cædinque mönö imonte iimäi cædinque pönö gönongä gongæmompa. Codito nänö nē da godongaimöni tönö tömengä beyæ nē apænemöni tönö iñömönite Wængongui mönitö imönite æninque wænömēnæca gönongä gongæñömönite wadäni inänite gä æænö tæi mænonte baï gönongä gongænänipa. ²¹ Codito nempo quēwēñömönite Wængongui mönitö

imönite adocooga gö cæte bai pönö tæi mænongä ate mönitö æicö bai bacö bai bamönipa. Edæ Wængongui Tæiyæ Waëmö Önöwoca ingante äanque bai ewocadinque mönitö godongämæ Awënë tæiyæ waëmö oncö bai bamönimpa. ²² Bayömönite mīnitö adobai tömengä nempo ongöñömīnite Wængongui mīnitö imīnite æninque mönitö tönö godongämæ māmö adocooga gö cæte tæi mænonte bai cædinque, Mīnitö botö Önöwoca tönö äawocaque bai ewocadinque botö owoquincö bai bamīnipa, ante pönö badongacäimpa.

3

Oodeoidi ināmaī ināni inānite apænecæ gotabopa, ante

¹ Māninö beyæ iīmaī ante apænebopa. Botö Pabodobo iñömö Codito beyæ ante oodeomīni ināmaī imīni imīnite apænecæte ante cæyömote botö imote edæ tee mönedāni wædömo inte yewæmömopa.

² Mīnitö oodeomīni ināmaī imīni iñömö iīmaī ante wabānö eñēmīnitawo. Wængongui pönö angä eñēninque botö mīnitö beyæ tömengä nānö waadete cædönö ante nē apænequēnēmo batabopa. ³ Māninö ante botö, Wængongui awēmö nānö cægāinö ante botö imote edonque odömongä atabopa, ante do wædænque yewæmömo amīnitawo. Edæ adodö ante ñöwo yewæmömopa.

⁴ İninque mānömainö ante botö do yewæmöninta adinque mīnitö, Mönö Codito awēmö nānö cægāinö ante Pabodo do ate bai eñengampa, ante eñēmaimīnipa. ⁵ Mönitö wæmæidi nāni quēwēñedē nē quēwengāināni iñömö, Mönö Codito iīncayæ ate pöninque æbānö awēmö cæquingää, ante

ēñēnāmaī inte wægadānimpā. Nōwo guiquēnē Codito beyæ nē apænedāni tōnō mōnitō tōmengā nānō nē da godōnimōni tæiyæ waēmō bamōni iñōmōnite Wængonguī Ōnōwoca mānīnō ante edonque odōmonte apænecā ēñēmōnipa.

⁶ Īmaī ante impa. Mōnitō Wængonguī nānō pōnonguincoo nē ænguīmōni iñōmōnite mīnitō oodeoidi ināmaī imīni inte mōnitō tōnō adocabomīni badinque edæ mōnitō tōnō godongāmæ nē ænguīmīni adobaī bamīnipa. Ayæ, Itota Codito tōnō pōnō cædinque Wængonguī nānō, Cōwē cæcæboimpā, ante angainō do cægacaimpā, ante watapæ pōnēninque mīnitō mōnitō tōnō edæ godongāmæ quēwencæmīnimpā.

⁷ Wængonguī nē tæī piñænongā inte waadete pōnō nanguī cæcā adinque edæ tōmengā beyæ nē cæbo badinque botō Codito ingantedō ante nē watapæ apænebo batabopa. ⁸ Mōnō tōmāmō Wængonguī quīmō iñōmonte botō iñōmō wamīni bai wīi imopa. Botō adoboque wædāmo pōnī imo incæte Wængonguī waadete cædinque pōnō angā ēñēmo inte botō mīnitō imīnite nē apænebo batabopa. Codito nānō pōnō cægainō ante æpodō ī, ante mōnō ædō cæte tee mante ēñenguī. Incæte Wængonguī waadete pōnō cæcā beyænque botō iñōmō Codito waa pōnī nānō pōnō cægainō ante edæ oodeo ināmaī imīni imīnite nē apænequēnēmo batabopa.

⁹ Ayæ Wængonguī tōmancoo nē badongaingā inte wēēnēñedē nāmanque entawēninque awēmō nānō wē wodongāinō ante botō imote odōmonte apænecantapa. Ayæ, Pabodo mānīnō ante edonque odōmonte apænequēnengā ingampa,

ante tömänäni eñencädänimpa, ante pönö apænecä æntabopa.

¹⁰ Codito ingante mönō godongāmæ pönencabo iñōmonte tömengä wadō wadō ante tömänō ante nē eñengaingä inte mönō tönō godongāmæ cæcampa. Mönō tönō mänōmaï cædinque tömengä, Botō wadō wadō ante tömänō ante botō eñengainō ante adinque öönæde quëwënäni awënëidi tönō mänñömö nē änäni tönō wæcädänimpa, ante cægacäimpa. ¹¹ Wëenëñedë pedæmāmo iñonte Wængonguï, Cæbo ate awënëidi incæ wæcädänimpa, ante cöwë pönengacäimpa. Nöwo iñömö tömengä mäninö ante nänö pönengainō ante tömengä mönō Awënë Itota Codito tönō godongāmæ cædinque do cægacäimpa. ¹² Codito nempo nē quëwëmö inte mönō tömengä ingante wede mönō pönënö beyænque guiñenāmaï inte Wængonguï weca do pöninque apænemompa. ¹³ Mänōmaï impa, ante edæ mīnitō do eñëmīnīpa. İninque botō mīnitō beyæ ante cædinque botō caate wädö ante pönëninque mīnitō wæætë wädämaï iedäni. Wæætë, Mönitō godömenque ñäö baï ëmoncæmönimpa, ante Pabodo caate wæcampa, ante pönëninque mīnitō wädämaï incæmīnīmpa ämopa.

Codito nänö pönënö ante

¹⁴ Mäninö beyæ mönō Awënë Itota Codito Wæmpocä iñongante botō tömengä önöwaca inö da guicapodinque apænebopa. ¹⁵ Tömengä iñömö edæ adocanque näwä Wæmpocä ingampa. İninque inguipoga quëwëmö incæ öönæde quëwënäni incæ

tömengä ingante, Mæmpo, ante nē tedemö iñömö mönō tömengä tönō mönō wæmpocabo bai imompa.

16 İninque mönō Wæmpocä ingante apænedinque botō mīnitō beyæ ante iīmaī ante apænebopa. Wængonguī bitō nē ñäö bai entawēmi inōmi inte bitō Tæiyæ Waēmō Önōwoca ingante epeteoidi inānite da pönōmi æninque tömēnāni wæætē edæ mīmō tæī piñænte entawencædānimpa, ante apænebopa. 17 Ayæ, Mönō Codito adobai mīnitō weca pōñongante mīnitō mīmōnē wede pönēninque tömengä ingante ædæmō entawencæmīnimpa, ante mönō Wæmpocä ingante apænebopa. Ayæ, Awæ ædæmō guiwa inte tömēmæ äwæate pæwæ bai cædinque mīnitō iñömö adobai tömengä nänō waadete pönēmāmo entawēninque edæ mīmōnē tæī ongōmīni bacæmīnimpa. 18 Ayæ mönitō Wængonguī quimōni tönō mīnitō adocabomīni inte tæī piñæmīni badinque, Itota Codito nänō waadete pönēnō ante ægancadō owoo, ante eñencædānimpa, ämopa. Ayæ, Tömengä nänō waadete pönēnō iñömö edæ yepanca pōni owopa, oopānō pōni owopa, æibæ pōni owopa, wincamō pōni owopa, ante eñencædānimpa, ante apænebopa. 19 Ayæ edæ, Mönō Codito waadete nänō pönēnō æbānō gomonga pōni owoo, ante mönō ædō cæte eñenguīi, ante mönō wædō incæte mīnitō mäninō ante eñencæmīnimpa. Ayæ edæ, Mäninō ante eñēmīni inte mīnitō Wængonguī nänō nanguī entawēnō edæ eyepæ pōni entawencæmīnimpa, ante botō mönō Wæmpocä ingante apænebopa.

20 Mönō änō ante ayæ mönō pönēnō ante

eyepæ cædongä inte Wængongui iñömö mönō imonte tæi piñænte nänō cæpāmo ganca cædinque nanguï gomonga cæcä ingampa. İninque ñōwo iñömö mönō Wængongui ingante waa ate pönente apæ necæimpa. ²¹ Edæ do wænte æigaināni tönō ayæ ate eñate quëwenguināni tönō mönō tōmāmō Codito ingante godongāmæ mönō pönencabo inömö inte Itota Codito ingante ewocadinque mönō godongāmæ apæ necæimpa. Mæmpo Wængongui eñēmi. Bitō adobique ñāō emongaimi inōmi imipa, ante mönō ñimpo cædāmaï inte cōwē waa ate apæ necæimpa. Mänōmaï impa, ante botō, Amëe, ämopa.

4

Codito nempo quëwëninque adocabomö imompa

¹ Waa cæte quëwencæminimpa, ante Wængongui aa pecantapa, ante eñēmīni inte mīnitō tōmengä nänō änonque ante eñente cædinque quëwencæminimpa. Botō mönō Awënë beyæ tee mönete wæcōmo incæ ämo eñēedāni. ² Mīnitō nāmā ængō cædāmaï inte, Önōmoque bai imopa, ante pönëninque wadāni inānite edæ ædæmō cæedāni. Æiquedō waa cæquīnāni, ante wædāmaï inte edæ piyænē cæte quëwëedāni. Ayæ wadāni mīnitō imīnite wënæ wënæ cædāni wædinque tōmënāni inānite wæætē piināmaï inte ædæmō waadete cæedāni. ³ Mīnitō, Mönō pönencabo piyænē cædinque cōwē adodō ante pönente edæ Wængongui Önōwoca tönō äanque bai ee ewocacæimpa, ante nanguï cædinque wacä ingä wacä ingä edæ waa cæedāni.

4 Mönö Awënë pönö cæcä ate watapæ bacæimpa, ante mīnitō adodeque ante pōnente tocæminimpa, ante Wængonguī mīnitō īminite edæ adodeque ante aa pegacæimpa. Īnīnque mǎnīne, Watapæ bacæimpa, ante mīni pōnēne adodeque ĩ bai Wængonguī Ōnōwoca edæ adobai adowocaque inte quēwengampa. Tōmengä adowocaque nempo quēwēnōmō inte mōnō adobai edæ adocabomonque inōmō ĩmompā. ⁵ Mönö

Awënë edæ adocanque pōni ĩnongä ĩñongante tōmengä ingante mōnō wede pōnēnō adobai adodeque pōni ĩnepa. Ayæ adodō ante pōnēnīnque æpænē guīdīnque mōnō adopænenque guīte bai guītamompā. ⁶ Wængonguī adocanque pōni ĩnongä inte tōmengä tōmāmō Wæmpocä adocanque ingampa. Tōmengä ĩñōmō edæ Tæiyæ Awënë pōni ĩnongä inte tōmāmō ĩmonte nē aacä ingampa. Tōmengä adocanque pōni nempo quēwēñōmonte tōmengä wæætē mōnō tōmāmō mīmōnē quēwengampa.

⁷ Incæte mōnō Codito, Mīmōnē bitō entawenganca ænte cæe, ante tee mante bai cædīnque adocanque ingante waadete pōnō cædīnque wacä ingante waadete pōnō cædīnque edæ tōmāmō ĩmonte tōmengä nānō pōnō cæcoo eyepæ pōnongä ænīnque entawēmompā. ⁸ Codito mǎnōmaī cæcæcæimpa, ante pōnēnīnque awënë Dabii wodi ĩmaī ante yewæmongacæimpa.

“Tōmengä æibæ æicæ cædīnque wadāni ĩnānīte bæi ongonte ñā cæyænte tōmengä mīñæ ænte mæicä æigadānimpa.

Ayæ æidīnque tōmengä mōnō waocabo ĩñōmonte,

Minitö entawenguinö, ante eyepæ pædæ
 pönongä ænte entawengamöimpa,”
 ante Dabii nänö yewæmonte angainö bai impa.

⁹ Mänine, “Æigacäimpa,” ante nani angaine iñömö
 quinante yewæmongatii. Edæ, Tömengä inguipoga
 tadömengadæ do wææningä inte æigacäimpa,
 ante odömoncæte ante yewæmongatimpa. ¹⁰ Nē
 wæængaingä inongä iñömö adocä do öönæde
 gömonga æidique inguipoga tömäo öönæde
 tömäo tömäo iñömö edæ godömenque æibæ pöni
 quëwengä inongä ingampa. ¹¹ Tömengä tömancoo
 nē enemocä inongä inte adocä mönö waomö
 imonte pönö angä ænte entawëninque mönö iimaï
 cæmö bamöimpa. Pancamöniya imönite tömengä
 angä ëñëninque tömengä nänö nē da godongaïmöni
 batamönipa. Pancamöniya guiquënë Wængonguï
 waa pöni nänö pönö cægäinö ante nē apænemöni
 batamönipa. Pancamöniya guiquënë Wængonguï
 beyæ nē apænemöni batamönipa. Pancadäniya
 guiquënë nē aadäni badänitapa. Ayæ pancadäniya
 guiquënë nē odömonte apænedäni badänitapa.
¹² Mänömaï pönö cædique mönö Codito mönö
 ocamö bai inongä inte, Botö baö bai adoyonque
 bai inäni iñömö ñancæ äate bai tæi piñænäni
 ëwocacædänimpa, ante pönö cægacäimpa. Mönö
 imonte tömengä, Minitö Wængonguï quimïni
 inömïni inte tömänäni inänite nē cæmïni inte godö
 cæcæmïnimpa, ante pönö cægacäimpa.

¹³ Mïni wede pönënö ante mïnitö tömämïni
 adoyömö ante pönencæmïnimpa, ante mönö Codito
 pönö cægacäimpa. Ayæ, Botö Wængonguï Wëmo
 iñömote mïnitö botö imote ate bai pönencæmïnimpa,
 ante tömengä pönö cæcampa. Ayæ æmæwo pæmïni

baï mīni baquinque mīnitō botō entawēnō ædæmō entawencæmīnīmpa, ante Codito edæ da pōnongā eyepæ æmōmpa. ¹⁴ Īnīnque æmæwo pædīmō inte wēñæmō ĩnāmaï ĩmō ĩnīnque mōnō edæ oda cædāmaï ĩngæīmpa. Wadāni guiquēnē mā pōnēnīnque, Æbānō cæmō ate oda cæquīnānīi, ante edæ nāmāneque tedewēnānīpa. Tōmēnāni ĩñōmō edæ babæ cæcæte ante cædīnque waa cæte baï cædāni ataquēedāni. Woboyæ ædæ go ædæ go pæmænte baï cædīnque tōmēnāni wadō ante odōmonte tedewēnānīpa. Mānōmaï wīdo pīñænte baï cædāni ĩncæte mōnō ĩñōmō Codito nānō entawēnoncoo ænte entawēnīnque äā mænāmaï ĩngæīmpa.

¹⁵ Wæætē Wængonguī, Nāwangā pōnī ĩmpa, ante nānō apænegaīnō ante mōnō tōmānāni ĩnānite waadete pōnēnīnque apænecæīmpa. Mānōmaï cædīnque mōnō Codito baō baï ĩñōmonte tōmēngā nē Ocamō baï inte pōnō angā beyænque mōnō ñancæ äadīnque godōmenque picæmō bamōmpa. ¹⁶ Mōnō baonga wepæ eyepæ ēñadīnque ñancæ äadīnque tæï pīñænte pæte quēwēmōmpa. Adobaï mōnō Codito baō tōnō adoyonque baï ĩnōmō inte mōnō tōmēngā nānō apænedō ante ēñēnōmo inte ñancæ äate pæte baï quēwēmōmpa. Ayæ wæætē ocai encamō inte mōnō pæ pagængūnque wangō tēnāmaï oguīncāi bamē ĩmpa. Ayæ adobaï mōnō Codito nānō waadete pōnēnō ante mīmōnē entawēmō inte mōnō wacā ĩngā wacā ĩngā godō aamō inte mōnō pōnencabo ĩncæ edæ tæï pīñænte entawēmōmpa.

Codito nempo mōnō ūmaï quēwēmōmpa, ante

17 Īninqe mōnō Awēnē nempo quēwēnōmo inte botō nō āmo ēñēdāni. Wadāni nē ēñēnāmaī ināni ōnonquedō ante pōnēninqe quēwēnānīpa. Mīnitō guiquēnē adobaī quēwengaimīni inte ñōwo wæætē ñimpo cædinque mǎnōmaī cædāmaī inguēnē quēwēmīnīi. 18 Tōmēnāni guiquēnē mīmō ēnēnānīpa diyæ Wængonguī weca ponguīnānīi. Mīmō ōmædēnāni inte tōmēnāni ocaī ēñēnāmaī badāni beyænque Wængonguī weca pōnāmaī inānīpa. Edæ wentamō mongæninqe tōmēnāni ocaī wēmō encadāni inte idiquibæ ante pōnēnānīpa. 19 Īnāni ĩñōmō tōmēnāni nāni cæquēnēnō ante ñimpo cædinque ñōwo wæætē guīñēnāmaī inte baō nāni towēinēnō ante cæcæte ante nāmā pædæ godonte baī edæ cædānīpa. Edæ, Quiēmē wīwa cæquīi, ante mǎnīnonque cæcæte ante godōmenque cæinente wædānīpa.

20 Wæætē mīnitō guiquēnē, Mōnō Codito æbānō ingāā, ante pōnēninqe edæ wīi tōmēnāni nāni cæinēwēnō baī mīni cæquinque edæ pōnēmīnitapa. 21 Tōmengā apænecā edæ wīi ēñēmīnitawo. Īñæmpa, Wængonguī nō pōnī nānō apænegainō ēñēninqe Itota ĩñōmō mīmōnē entawengampa, ante mīnitō tōmengā nempo quēwēñōmīnite tōmengā mǎnōmainō ante adodō ante edæ do odōmonte apænecā ēñēmīnitapa. 22 Mīnitō wēēnēñedē mīni cæte quēwengainō ante tōmengā ĩīmaī ante odōmonte apænegacāimpa. Babæ pōnente mīni cæinente wæwēnō beyæ mīnitō mīmōnē wentamō mongænte wæwēmīni inte do mīni entawengainō ante edæ wido cæedāni, ante odōmonte apænegacāimpa. 23 Edæ mempoga ēñagaimīni inte mīnitō ēñēnō do mīi pōnī encamīni

inte müinonque ante pönencæminimpa, ante odömönte apæneçä eñëmînitapa. ²⁴ Ayæ, Botö pönö badömo ate mînitö botö bai tæiyæ waëmö ewocadinque nö pönî cæte quëwencæminimpa, ante Wængonguî pönö badongä ate mînitö müimîni bagamînimpa. Ìnînque tömengä, Mänînö Wængonguî nö pönî nänö entawënö ænînque mînitö ædæmö entawencæminimpa, ante odömönte apæneçä do eñëmînitapa.

²⁵ Mänömaî beyæ mînitö tömämîni, Mönö adocabomö ìmompä, ante adînque babæ mîni tedewënînö ante ñimpo cædinque wacä ingante wacä ingante näwangä ante apæneedäni.

²⁶ Ænguî bamîni incæte mînitö piyænë cædinque wacä ingante wënæ wënæ cædämaî ee aedäni. Edæ gäwadecæ ganca nanguî piînînque edæ mîni wæquinque ìmaimpa. ²⁷ Mänömaî cædinque mînitö, Wënæ incæ pönö cæçä ate botö ænguî batäbopa, ante pönente wædinque ñöwo wæætë, Wënæ botö weca pönämaî incæçäimpa, ante nämä wææ cæedäni.

²⁸ Në awëmö æningä iñömö ñöwo edæ ee cædinque awëmö ænämaî incæçäimpa. Wæætë, Botö önompoca nanguî cædinque ænte quëwëninque në ænguënënäni ìnänite adobai godömo æncædänimpa, ante cæçäçäimpa.

²⁹ Mînitö nämä önöne wææ aadinque wiwa ante tededämaî ìedäni. Wæætë edæ, Wädäni æbänö ante eñënguënënäni ìnänî, ante pönëninque mînitö, Tömënäni tæi piñænte entawencædänimpa, ante cædinque në eñënäni beyænque ante waadete godö cædinque apæneedäni. ³⁰ Wængonguî Tæiyæ Waëmö Önöwoca iñömö mînitonga pö guiidinque,

Botö æmo beyænque mīnitö iincayæ ate æmæwo abæ tawænte gote bai quëwencæmīnīmpa, ante odömoncæte ante yewæmōte bai cægacāīmpa. Īnīnque mīnitö, Wēnæ wēnæ mōni cædö beyæ ante Wængonguī Önōwoca wæwente badāmaī incæcāīmpa, ante wææ cædinque edæ ēñēnte cæedāni.

³¹ Ayæ, Wīi waēmō awædö, ante mīni pīiwēnīnō ante edæ ñīmpo cæedāni. Äīmō ante mīni pönēwēmāmo adobai ñīmpo cædinque ænguī pōni mīni badīmāmo edæ ñīmpo cæedāni. Yæ ante mīni pīinte ogæ tedewēmāmo, wacā ingante ante mīni pīinte tedewēmāmo edæ ñīmpo cæedāni. Ayæ pīinte cæquinque ante mīni entawēnīnō ante tōmānō edæ wido cæedāni. ³² Wæætē godongāmæ waadete cædinque wacā caate wæcā adīnque mīnitö godongāmæ Ca ca wæcæmīnīmpa. Ayæ Codito ængā beyænque Wængonguī mīnitö imīnite pönō ñīmpo cæcampa cæmīnīi. Tōmengā ñīmpo cæcā quëwēmīni bai mīnitö adobai cædinque wadāni wēnæ wēnæ cæyönānite wacā ingā wacā ingā ñīmpo cæmīni quëwēnānīi.

5

Wængonguī wēmīni, iīmaī cæte quëwēedāni, ante

¹ Īnīnque Wængonguī wēmīni iñōmō mīnitö tōmengā nānō nē waademīni inōmīni inte Wæmpocā nānō cæi bai ante cōwā adīnque adobai cæedāni. ² Baö, Wængonguī quī, ante godōnīnque, Oguī wacæīmpa, ante iya tānāni bai cædinque Codito mōnō imōte waadete pönēnīnque edæ adobai cægacāīmpa. Tōmengā iñōmō, Botö

Wængonguī quīmo imopa, ante nāmā wepæ pædæ godöningue mönō imonte wæætē ængacāimpa. Inique tömengä nänō waadete pönēnō bai mīnitō adobai waadete pönēningue quēwēedāni.

³ Wæætē edæ mīni pönencabo iñōmīnite waocā adocanque incæ nänōogængä ināmai iñongante godō guēa mönāmai iedāni. Wentamō mongæ wæcæ wæ, ante edæ wīwa cædāmai iedāni. Nanguī māincoo ante æīnente wædāmai iedāni. Māninō tömänō cædāmai imīni inte māninō ante edæ adopoque incæ tededāmai imæwedāni. Edæ Wængonguī quīmīni tæiyæ waēmō entawēmīni inte mīnitō māninō tömänō cædāmai incæmīnīmpa.

⁴ Wentamō ante nāni pönēwēnō bai mīnitō wæætē adobainō ante pönēnāmai iedāni. Önonque ante nāni tedewēnō bai mīnitō wæætē adobai tededāmai iedāni. Wēnæ wēnæ ante pönente nāni badete towēnō bai mīnitō wæætē adobai badete todāmai iedāni. Iñæmpa Wængonguī quīmīni inōmīni inte mīnitō māninō ante wīi pönenguēnēmīni imīnīpa. Wæætē Wængonguī ingante waa ate pönēningue apænequēnēmīni imīnīpa.

⁵ Awēnē Odeye Wængonguī nempo ayæ Awēnē Odeye Codito nempo edæ ædānidō nē guīte ænguīnāni inānīi. Nänōogængä ināmai iñongante nē towēnāni tönō wentamō pönente nē cædāni iñömō tömēnāni edæ dicæ guīte ænguīnāniyaa. Ayæ māincoo ante wacā quī nē æīnente wæwēnāni iñömō edæ, Māincoo incæ mönitō wængonguī impa, ante bai cædāni inōnāni inte tömēnāni adobai edæ guīte ænāmai incædānīmpa. Ante ämo ēñēedāni. ⁶ Wadāni, Mīnitō oda cæcæmīnīmpa,

ante önonquedö ante tedete cæyönänite mīnitö wæætē tōmēnāni nāni tededö ante edæ ēñēnāmaī iedāni. Edæ tōmēnāni ēñēnāmaī inte nāni wēnæ wēnæ cædö beyæ Wængonguī ænguī badinque tōmēnāni inānite pancæcāimpa. ⁷ Īnīnque mīnitö gooque gomö adinque tōmēnāni tönö godongāmæ cædāmaī iedāni.

⁸ Mīnitö iñömö wēēñēdē wentamö mongæmīni ingaīmīni inte ñōwo wæætē edæ mönö Awēnē nempo quēwēnīnque edæ ñäö baī entawēmīnīpa. Īnīnque Mæmpo nānö ñäö emönö baī entawēmīni inte mīnitö ñäö iñömö cægonte baī edæ waa quēwēedāni. ⁹ Edæ waiwæ waincate baī cædinque mönö wadāni inānite godö waa cæquinque mönö edæ ñäö iñömö quēwēmōmpa. Ayæ nō pōnī mönö cæquinque nāwangā pōnī ante mönö apænequinque edæ ñäö iñömö quēwēmōmpa. ¹⁰ Ayæ, Æbānö cæmō ate mönö Awēnē, Waa cæmīni abopa, ante apænequingā, ante ēñencæte ante cædinque do ēñēnīmi inte tōmengā nānö waa adonque cæedāni. ¹¹ Wadāni wēmo iñömö önonque nāni cædö ante adinque mīnitö iñömö edæ gooque gomö aedāni. Ayæ tīca ēnente baī cædinque, Tōmēnāni nāni cædö wēnæ wēnæ impa, ante edonque odömömīni acædānīmpa. ¹² Awēmö nāni cædö beyæ guingo imonte wæquēñēnāni iñönāni mönö iñömö edæ guīñēnete wædinque mānīnö ante edæ tededāmaī ingæīmpa. ¹³ Wæætē edæ, Awēmö iñömö æbānö cædānīi, ante tōmānö ante edæ tīca ēnente edonque acæīmpa. ¹⁴ Ñäö beyænque edæ edonque amōmpa. Mānōmaī ī beyæ īīmaī ante āmotamīni ante baī apænedānīpa. “Bitö wangæ möīmi inte ñāni ömæmonte ængæ

gantie.

Edæ ængæ gantiyömite

Codito incæ pönö tica ënente bai cæcä ate ñäö entawencæbiimpa,” ante apænedänipa.

¹⁵ Mänömaï beyæ mïnitö ocäi ömæcamïni ïnämaï ïnömïni inte wæætë ocäi në encamïni inte cædinque, Æbänö waa cæte quëwenguïmo, ante nämä waa ate waa cædäni. ¹⁶ Wadäni ñöwo incæ godömenque wïwa cædänipa cæmïni. Eyepæ ïñonte mïni cæquënenonque ante edæ do cædäni. ¹⁷ Edæ wëñænäni owempote cædäni bai mïnitö adobaï cædämaï ïedäni. Wæætë, Wængonguï æbänö angantawo, ante ëñëninque mäninonque ante ëñente cædäni. ¹⁸ Waodäni biïnömæ näni ämæ bedinque dowænte badinque godömenque pönënamaï cædinque tömënäni näni ëwente wæwenguinque bewënänipa. ïinque mïnitö ïñömö bete dowænte badämaï ïedäni. Wæætë Wængonguï Önöwoca ingante ædæmö ëwocate quëwëedäni. ¹⁹ Ämotamïni ante bai godongämæ watapæ ante tedeedäni. Awënë Dabii wodi nänö ämotamïni angaintaa adinque edæ adodö äedäni. Ayæ mïnitö nämä mä pönëninque, ïïmaï Wængonguï beyæ mönö ämotamïni angæïmpa, ante adodö äedäni. Wængonguï Önöwoca angä ëñente ëwocadinque tömengä ämotamïni nänö änönö ante adodö äedäni. Mïmöno ämotamïni ante bai pönëninque mïnitö mönö Awënë ingante watapæ pönente äedäni. ²⁰ Æbämë bayonte mïnitö tömänö beyæ ante edæ Mæmpo Wængonguï ingante cöwë waa ate pönëninque mönö Awënë Codito ëmöwo ante apæneedäni.

Mæmpoidi nāni wencabo iūmaī quēwencædānimpa

21 Mönö Codito ingante guĩñente wædinque mīnitö wīī nāmā mīni pönēnonque bai cædinque wæætē edæ, Nē ānāni æbānō ānāni, ante Ao ate nōinō ante cæedāni.

22 Onquiyæmīni ēñēedāni. Mīnitö, Mönö Awēnē nānō angainō bai mönō ēñente cæcæimpa, ante tōmēmīni nānōogænāni inānite Ao ante ēñente cæedāni. 23 Edæ Codito ingante mönō godongāmæ pönencabo iñōmonte mönō Codito adocā iñōmō, Quēwencæmīnimpa, ante nē Ængaingā inongā ingampa. Tōmengā tönō mönō adoyonque bai iñōmonte tōmengā iñōmō mönō Ocamō bai inongā ingampa. Ayæ onquiyængā tönō onguĩñængā adobai adoyonque bai iñōnate onguĩñængā iñōmō nē ocamō bai inongā ingampa. 24 Ininque Codito ingante mönō godongāmæ pönencabo incæ tōmengā ingante Ao ante ēñente cæmō bai onquiyænāni adobai tōmēnāni nānōogænāni inānite cōwē edæ Ao ante ēñente cæquēnēnāni inānipa.

25 Wæætē onguĩñæmīni ēñēedāni. Mīnitö Codito nānō waadete pönēnō bai tōmēmīni nānōogænāni inānite adobai waadete pönēedāni. Tōmengā ingante mönō godongāmæ pönencabo iñōmonte tōmengā iñōmō mönō imonte waadete pönēninque mönō imonte æncæte ante pönō cædinque nāmā wepæ godongacāimpa. 26 Ayæ, Wængonguī nānō apænedō waēmōmæ imæ bai iñonte mīnitö iñōmō mānīnō ante ēñēninque tæiyæ waēmō ewocate quēwencæmīnimpa, ante mönō Codito adocā mönō imonte edæ ñā mēnongate bai cægacāimpa. 27 Mānōmaī tæiyæ waēmō badinque

mönö wentamö mongænämaï inte Codito ingante mönö pönencabo adocabomö iñömonte tömengä iñömö edæ nänöogængä ænte bai cædinque mönö pönencabo imonte, Bitö, ante apænegacäimpa. Ayæ mönö cabo iñömonte tömengä, Bitö idiquibæ entawënämaï iñömite ædö cæte bitö imite piinte anguiï, ante pönö cægacäimpa. Ayæ wæætë edæ, Ñä mënongate bai tæiyæ waëmö ëmömi inique mönö edæ guëa ñäö apäite bai ëmongæimpa, ante Codito nänöogængä ænte bai mönö imonte pönö ængacäimpa.

²⁸ Onguiñænäni iñömö adobai tömënäni, Botö baö, ante näni pönë bai tömënäni nänöogænäni inänite adobai waadete edæ pönenguënänäni inänipa. Æcänö tömengä nänöogængä ingante waadete pönëna iñömö tömengä nämä baö ante waadete pönente bai edæ cæcampa. ²⁹ Iñæmpa waocä nämä baö cöwë piinämaï ingampa. Wæætë, Botö baö, ante edæ pæ gompodique pönö aacampa. Ayæ adobai Codito ingante mönö godongämæ pönencabo iñömonte edæ tömengä adobai, Botö baö, ante bai cædinque mönö imonte wææ gompodique pönö aacampa. ³⁰ Edæ mönö Codito në Ocamö bai inongä inte në angä iñongante mönö wæætë tömengä tönö adoyonque bai inte ëñente quëwëmompä. ³¹ “Mänömaï beyæ onguiñængä mäempo tönö badä inate ëmö cæte godinque onquiyængä ingante, Botö nänöogængä, ante æmæwo monte quëwencæcäimpa. Mënaa inäna incæ tömëna wæætë näna gæncaya badinque adocanque bai bacædaimpä,” ante yewæmongatimpa.

32 Mänömainö ante nani yewæmongainö ante edæ wë wodonte bai i iñonte wii tömänö ante eñëmompä. Incæte, Codito ingante mönö godongämæ pönencabo iñömonte mönö tömengä tönö adocanque bai imöimpa, ante minitö eñencæminimpa, ante botö apænetabopa. 33 Incæte onguiñæmi nämä bitö waadete pönënonganca tömëmi nänöogængä ingante edæ adoganca waadete pönencæbiimpa. Onquiyæmi adobai, Botö nänöogængä ingampa, ante adinque edæ eñente cæcæbiimpa.

6

1 Wëñæmini guiquënë eñëedäni. Minitö mönö Awënë nempo quëwënömini inte tömëmini mæmpoidi inänite edæ ædæmö eñente cæedäni. Æcänö edæ mänömai cædaa tömengä edæ nö pöni cæcampa. 2 “Wæmpocä ingante wäänä inante waa adinque tömëna inate godö waadete cæe,” ante Wængongui incæ wææ angacäimpa. Tömengä wade nänö wææ angainö äninque, Mini waa quëwenguinque cæcæminimpa, ante apænedämai ingaingä inte ñöwo iine ante wææ äninque, Mini waa quëwenguinque cæcæminimpa, ante mä apænegacäimpa. 3 Edæ iine ante wææ äninque tömengä, “Mänömai cæmini ininque minitö watapæ quëwëninque iimæca wantæpiyæ quëwencæminimpa,” ante mä apænegacäimpa.

4 Wæmpomini guiquënë eñëedäni. Minitö wënanä wii äinäni bacædänimpa, ante wææ cædinque minitö tömënanä inänite piinte cædämai iedäni. Wæætë, Mönö Awënë wææ aadinque mönö imonte päninque odömonte apænecampa, ante adinque

mīnitō tōmengā nānō cæī bai adobaī cædinque wēñænāni inānite ædæmō wææ aadinque mōnō Awēnē nānō apænedō ante odōmonte apænemīni ate tōmēnāni waa pæcædānimpa.

⁵ Waodāni mīnitō īmīnite ō ænāni inte tōmēnāni beyænque cæte nē quēwēmīni īñōmīnite apænebo ēñeedāni. Īmæca mīnitō awēnēidi inānite mīnitō waa adinque guīñente wædinque tōmēnāni nāni ānō ante ēñente cæedāni. Mīnitō Codito angā ēñente mīmōnē nō pōnente cæmīnitawo. Īnīnque edæ Īmæca awēnē angā ēñente edæ adobaī mīmōnē nō pōnente cæedāni. ⁶ Mīnitō edæ, Awēnē botō īmote waa acæcāimpa, ante tōmengā ayongante ēñente cæmīnitawo. Īñæmpa awēnē dæ goyongante adobaī cōwē ēñente cæedāni. Codito botō īmote nē godonte Ængaingā ingante nē cæte quēwēmō īmōmpa, ante pōnēnīnque mīnitō edæ Wængonguī nānō ānōnō ante mīmōnoque pōnente cæedāni.

⁷ Mīnitō mīmōno piyænē cædinque īīmaī ante pōnente cæedāni. Īmæca awēnē ingante cædinque botō wīī waocā beyænque ante cæbopa. Wæætē Wængonguī Awēnē beyænque ante botō Īmæca awēnē ingante cæbopa, ante pōnēnīnque pæ piñænte bai cæedāni. ⁸ Mīnitō īīmaī ante edæ do ēñēmīnīpa. Mīnitō wacā nānō ō ænīmīni inte tōmengā beyænque nē cæte quēwēmīni incæ abæ tawænte ee gote bai nāmā beyænque cæte quēwēmīni incæ mīnitō īmīnite mōnō Awēnē īñōmō, Bitō ægancadō waa cæbīi, ante adinque wæætē eyepæ pōnī pædæ pōnongā ænguīmīni īmīnīpa.

⁹ Waocā ingante nē ō æmīni guiquēnē ēñeedāni. Mīni nē ō ængaināni inānite adobaī waa cæedāni. Tōmēmīni Awēnē incæ tōmēnāni Awēnē adocā

inongä inte öönædë owocampa cæminii. Tömengä iñömö wacä ingante wadö wacä ingante wadö ate pönente cædämaï ingampa. Mänömainö ante do ëñëmïni inte mïnitö beyænque cæte nê quëwënäni inänite edæ piïnte äninque edæ pæmënänämaï iedäni.

Tæinta wëñate bai mönö tæi piñænte ewocacæïmpa

¹⁰ Ñöwo iïmaï yewæmöninque botö idæwaa yewæmömopa. Minitö mönö Awënë nempo nê quëwënömïni iñömïnite tömengä nänö tæi piñænö pædæ pönongä æninque tæi piñænte entawente quëwëedäni. ¹¹ Minitö wææ caaquincoo, ante Wængonguï eyepæ pöni nänö da pönönincoo tömancoo æninque wëñate bai cædinque tæi ongödäni. Edæ mänincoo tömancoo wëñate ongöñömïni wënæ awënë, Oda cæcæminimpa, ante nanguï ëñente cæcä incæte mïnitö wæætë oda cædämaï inte edæ tæi ongoncæminimpa.

¹² Edæ wïi waodäni inänite mönö guëadö guëa cæcæïmpa. Wæætë wënæidi awënëidi tönö wënæidi inänite nê änäni iñönänite mönö tömënäni inänite wæætë guëadö guëa cæcæïmpa. Inguipoga wëmö iñömö tæi piñænte ënempodäni tönö öönædë iñömö wënæcoo nê wiwa ewocate cædäni tönö mänimpodäni mämö ti gotodoncæ cæyönänite mönö wæætë guëadö guëa cæcæïmpa. ¹³ Ininque tömënäni piïnte mämö näni wiwa cæönæ iinque bayonte mönö wodii winönämaï inte tömënäni inänite wæætë da godongæïmpa. Ante ayæ, Tömää edæ eyepæ cæte ate mönö edæ tæ go wæænämaï inte adiyæ ongongæïmpa, ante cædinque mïnitö Wængonguï nänö, Wææ caaquincoo, ante tæinta

baï nänö da pönöincoo edæ do eyepæ æninque tömancoo edæ da wēñaedäni.

¹⁴ Wēñadinque edæ wodii winönämaï inte edæ næ gongænte tæï ongödäni. Edæ, Tæï wææ caaquincoo, ante pönö tæï pacadeyænte baï cædinque mīnitö Wængonguï nänö nö pönönö entawëninque adobaï nö entawente quëwëedäni. Tæcætawë inö tæineta mīni wææ wodontawëinta ante wēñate baï cædinque Wængonguï tæiyæ waëmö nänö cædö ante edæ entawente tæï cæte ongödäni. ¹⁵ Mönö Codito pönö cæcä beyænque mönö godongämæ piyænë cæcæimpa, ante watapæ mönö ëñënö beyæ pogodo gote apænecæte ante cædinque mīnitö awæncata tæï wææ cæwainta wëwate baï cædinque gänë pönente cæedäni.

¹⁶ Yabæque pönï wææ cæquinta tæinta baï næænte baï cædinque mīni wede pönönö ædæmö entawëninque quëwëedäni. Ìninque në wīwa cædongä ponte gonga encado baï to piyæncate baï cædinque, Mīnitö oda cæcæmīnimpa, ante cæcä ate mīnitö mīni wede pönönö beyænque tömengä wīwa nänö änö ante edæ ëñënämaï incæmīnimpa. ¹⁷ Ayæ, Ocamö incainta tæinta baï impa, ante wææ wencate baï cædinque mīnitö Codito pönö ængä beyænque mīni quëwenguinö ante ænte entawencæmīnimpa. Mīnitö yaëmë wææ næænte baï cædinque Wængonguï Önöwoca apænecä ëñëninque nāni yewæmongainta ate ædæmö ëñëninque edæ cöwë entawëedäni.

¹⁸ Ayæ Wængonguï Önöwoca ingante ëwocadinque mīnitö tömengä ingante, Wængonguï bitö cöwë cæcæbiimpa, ante godömenque nangui

apænedinque ñine cædāmaï ïedāni. Mänömaï cæcæte ante mīnitō mīimīni ongōnīnque wæntæte badāmaï inte Wængonguï quīnāni tōmānāni beyæ ante cōwē apæneedāni. ¹⁹ Ayæ botō beyæ ante adobaï apænemīni eñēnīnque Wængonguï pōnō cæcā ate botō edonque tedecæboimpa, ämopa. Edæ Codito ingantedō ante wēenēñedē mōnō eñēnāmaï ingāine ante botō ñōwo watapæ eñēnīnque guīñēnedāmaï inte apænebo eñencædānimpa, ämopa. Mänömaïnō ante mīnitō Wængonguï ingante apæneedāni, ämopa. ²⁰ Mānīne ante botō wadāni weca nē gote apænebo beyænque ñōwo gæguīncamē encaipobo inte wæbopa. Ìnīnque, Mānīne ante nē apænequēnengā inte Pabodo cōwē guīñēnedāmaï inte apænecæcāimpa, ante mīnitō botō beyæ ante apæneedāni.

Waa quēwencæmīnimpa, ante

²¹ Botō Pabodo ïñōmō æbānō quēwēmoo, ante, Quīnō baï cæboo, ante eñencæte ante wæmīnitawo. Edæ Tiquico mōnō tōñīñacā mōnō nē waadecā ïnongā inte tōmengā ñōwo pōnīnque mīnitō ïmīnite māñnō tōmānō ante apænecā eñencæmīnimpa. Tōmengā ïñōmō mōnō Awēnē nempo quēwēnīnque tōmengā beyæ nē cædongā inte cōwē nē pōnengā inte ædæmō cæcā acæimpa. ²² Ìnīnque, Pabodoidi æbānō quēwēnānīi, ante tōmengā pōnō apænecā eñēnīnque mīnitō wampo pōnēnīnque tæï piñænte entawencæmīnimpa. Ante cædinque botō, Ædæmō apænebi eñencædānimpa, ante tōmengā ingante mīnitō weca da godōmo pongā aedāni.

²³ Mæmpo Wængonguï tōnō mōnō Awēnē Itota Codito mīnitō ïmīnite waadete pōnō cæda ate

mīnitō mīni caipæ incæ gänë entawëninque
wede pönëninque godongämæ edæ waadete
pönencæminimpa, ämopa. ²⁴ Æcänö mönö Awënë
Itota Codito ingante cōwë waadete pönente
ñimpo cädämaï ina iñömö tömengä ingante
Wængonguï pönö waadete cæcæcäimpa, ante botö
Wængonguï ingante apænebopa. Mäninque ante
yewæmömopa.

Wængonguī nānō Apænegainō
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

9bedab5a-39ff-5163-a35b-8056cbbe8690